

禮

記

集

解

禮記卷四十六

賜進士及第翰林院編脩 國史館纂脩孫希旦集解

祭義第二十四 別錄屬祭

方氏慤曰陳乎外者祭之法存乎中者祭之義君子於祭豈徒法為哉亦有義存焉爾愚謂此篇自篇首至公桑蠶室章皆明祭祀之義次言禮樂之養人次言孝親之道次言尚齒之義篇末又專以祭祀言之蓋事死事生其道一也故因祭而言孝事父事兄其道一也而敬老之義即因事兄之心而推之者故又因孝親而言尚齒獨其言禮樂者於前後不相比附而本見於樂記疑樂記重出之文而錯在此篇耳

祭不欲數數則煩煩則不敬祭不欲疏疏則怠怠則忘是

故君子合諸天道春禘秋嘗 釋文數色角反○按

禘字當讀為禴下同

方氏慤曰數疏言其時煩怠言其事不敬與忘言其心  
愚謂禘當作禘諸侯春祭之名也四時皆祭言春秋則  
該冬夏矣天道每時一變而孝子思親之心因之故二  
歲四祭者不疏不數之節也

霜露既降君子履之必有悽愴之心非其寒之謂也春雨  
露既濡君子履之必有怵惕之心如將見之

鄭氏曰非其寒之謂謂悽愴及怵惕皆爲感時念親也  
霜露既降禮說在秋此無秋字蓋脫爾孔氏曰如將見  
之念親如得見親也悽愴云非其寒之謂則怵惕非其  
煖之謂怵惕云如將見之則悽愴亦如將見之是其互  
也

樂以迎來哀以送往故禘有樂而嘗無樂

鄭氏曰迎來而樂樂親之將來也送去而哀哀其享否

不可知也小言之則爲一祭之間孝子不知鬼神之期推而廣之放其去來於陰陽孔氏曰小言之爲一祭之間既不知鬼神來去期節故祭初若來而樂祭末似去而哀推一祭而廣論一年神之去來似於陰陽二氣但陽主生長春夏陽來似神之來故祭有樂秋冬陰似神之往故祭無樂然周禮四時之祭皆有樂殷則烝嘗之祭亦有樂故那詩云庸鼓有數萬舞有奕下云顧予烝嘗則殷秋冬亦有樂愚謂春者陽氣之至而申者也故其祭也所以迎乎親之來秋者陰氣之反而屈者也故其祭也所以送乎親之往樂其來故有樂哀其往故無樂然天子四時祭皆用樂嘗祭無樂蓋諸侯之禮也說已見郊特牲

致齊於內散齊於外齊之日思其居處思其笑語思其志

意思其所樂思其所嗜齊三日乃見其所為齊者釋文齊

後不出者同樂音洛又五教反

鄭氏曰致齊思此五者也散齊不御不樂不弔耳見所為齊者思之熟也所嗜素所欲飲食也孔氏曰先思其麤漸思其精故居處在前樂嗜在後愚謂致齊於內專其內之所思也散齊於外防其外之所感也所樂所樂為之事也所嗜所嗜飲食之物也齊三日必見所為齊者由其專精之至也

祭之日入室儼然必有見乎其位周還出戶肅然必有聞乎其容聲出戶而聽愾然必有聞乎其嘆息之聲釋文儼音愛還

音旋本或作旋愾間代反

入室謂始祭時也儼然髣髴有見之貌周還出戶謂朝事之時出戶而事尸於堂也出戶而聽謂祭畢尸將設

而主人出戶也特牲禮主人出立于戶外西面祝東面  
告利成尸諤少牢禮主人出立于阼階上西面祝出立  
于西階上告利成祝入主人降立于阼階東西面尸諤  
祭畢而送之故如聞乎其嘆息之聲蓋人子之於祖考  
以送其往爲哀則祖考之心亦必以其往爲哀故宜有  
嘆息之聲也馬氏晞孟曰儼然言其貌肅然言其容儼  
然言其氣

是故先王之考也色不忘乎目聲不絕乎耳心志嗜欲不  
忘乎心致愛則存致慈則著著存不忘乎心夫安得不敬  
乎

方氏慤曰色不忘乎日常若承顏之頃也聲不絕乎耳  
常若受命之際也愚謂先王事死如生事亡如存故其  
耳目之所接心之所念無時不在於親非特祭祀之時

而已也致其愛親之心則雖亡如存致其誠懇之意則雖幽而著著存不忘乎心者言其愛懇無時而或忘也如此則安得有斯須之不敬者乎

君子生則敬養死則敬享思終身弗辱也君子有終身之喪忌日之謂也忌日不用非不祥也言夫日志有所至而不敢盡其私也

釋文養羊尚反夫音扶言夫日或作言夫忌日

鄭氏曰忌日親亡之日忌日不用舉他事如有時日之禁也祥善也志有所至至於親以此日亡其哀心如喪時愚謂思終身弗辱者敬養敬享之心無時而或忘而思以守其身者孝其親也既言君子有終身之敬又言君子有終身之哀忌日親之死日不用不以爲他事也夫口此日也志有所至言志極於念親也不敢盡其私不敢盡其心於私事也

唯聖人爲能饗帝孝子爲能饗親饗者鄉也鄉之然後能  
饗焉是故孝子臨尸而不作君牽牲夫人奠盞君獻尸夫  
人薦豆卿大夫相君命婦相夫人齊齊乎其敬也愉愉乎  
其忠也勿勿諸其欲其饗之也

釋文鄉許亮反齊齊如字○鄭註上饗或爲相

馬氏晞孟曰饗帝饗親致其誠而已蓋德不足以與之  
對則亦非鄉之之盡也聖人盡天道者也孝子盡人道  
者也愚謂色不利而有所變動曰作臨尸而不作者惟  
其誠於鄉之而已祭祀之禮主人主婦獻尸尸皆親受  
之不奠也奠當作薦禮器曰君親牽牲大夫贊幣而從  
君制祭夫人薦盞是也注疏以此所言爲釋祭又以奠  
盞爲設盞齊之尊盞亦以奠盞之文爲疑而欲曲通之  
然其說益無據矣祭禮先薦豆次君獻尸次夫人獻尸  
此於二事乃逆陳之者蓋於君夫人各以一事相對言



之故不以先後爲序也齊齊乎其敬者言其敬容之齊  
一也愉愉乎其忠者言其和順之發於誠也勿勿者勸  
勉之意詩黽勉從事劉向引之作密勿從事是也勿勿  
諸其欲其饗之者言其欲神之饗之勉勉而不敢懈也  
文王之祭也事死者如事生思死者如不欲生忌日必哀  
稱諱如見親祀之忠也如見親之所愛如欲色然其文王  
與詩云明發不寐有懷二人文王之詩也祭之明日明發  
不寐饗而致之又從而思之祭之日樂與哀半饗之必樂

已至必哀

釋文樂音洛

孔氏曰思死者如不欲生者言思念死者意欲隨之而  
死也稱諱如見親者廟中上不諱下於祖廟稱親之諱  
如似見親也愚謂欲色謂有欲得之色也大戴禮文王  
官人篇欲色嫗然以愉蓋致齊之時思親之所樂嗜故

祭之日如見親之所愛若有欲得之色然也詩小雅小  
宛之篇明發謂將旦而光明開發也二人謂父母也祭  
之明日明發不寐者謂祭畢之夕思念父母不寐以至  
於明日之旦也饗而致之者謂祭時如見其親也又從  
而思之者既祭而又明發不寐以思之也樂與哀半樂  
其來格而哀其將往也樂以迎來哀以送往此以一歲  
之來往爲哀樂者也饗之必樂已至必哀此以一祭之  
始終爲哀樂者也上章言唯仁人爲能饗帝孝子爲能  
饗親此又言文王之祭如此蓋必仁孝如文王然後以  
之饗帝饗親而無不盡也

仲尼嘗奉薦而進其親也慙其行也趨趨以數已祭子貢  
問曰子之言祭濟濟漆漆然今子之祭無濟濟漆漆何也  
子曰濟濟者容也遠也漆漆者容也自反也容以遠若容

以自反也夫何神明之及交夫何濟濟漆漆之有乎反饋  
樂成薦其薦俎序其禮樂備其百官君子致其濟濟漆漆

夫何恍惚之有乎夫言豈一端而已夫各有所當也釋文

促數色角反徐音速濟子禮反漆依註音切容也口白反  
下客以遠同容也羊凶反下若容以自反同恍惚往反一  
音荒惚音忽本又作忽當丁浪反○按容也遠也容以遠  
王肅本及釋文並作容今從鄭作容反饋孔疏以及至釋  
之是孔氏本作及饋又疏云定  
本作反按反義為長今從定本

鄭氏曰嘗秋祭也親謂身親執事時也惹與趨趨言少

威儀也趨讀如促數之言速也漆漆讀如朋友切切自

反猶言自脩整也容以遠言非所以接親親也容以自

反言非孝子所以事親也及與也此皆非與神明交之

道也孔氏曰濟濟者容貌自疏遠漆漆者容貌自反覆

而脩整也愚謂反饋者天子諸侯之祭既行朝踐之禮

於堂乃反於室而行饋食之禮也樂成者樂至合舞而

成合舞常饋食之節也上薦謂進也下薦謂邊豆之實也此謂所進饋食之邊豆也俎謂饋熟之俎也百官廟中助祭者君子即百官也諸侯祭禮二灌朝踐君與夫人交獻而已至饋食而後賓長醑尸至為加爵而後長兄弟眾賓長獻尸於此時而君子乃致其濟濟漆漆蓋濟濟漆漆乃助祭者之容而非主祭者之容也恍惚髣髴若有見聞之意若事鬼神而有濟濟漆漆之容則情意疏遠而無如將見之誠矣

孝子將祭慮事不可以不豫比時具物不可以不備虛中

以治之釋文比必稱反  
○比時句絕

比時及祭時也虛中謂心無他念之雜專致其精明以交於神明也

宮室既脩牆屋既設百物既備夫婦齋戒沐浴盛服奉承

而進之洞洞乎屬屬乎如弗勝如將失之其孝敬之心至也與薦其薦俎序其禮樂備其百官奉承而進之於是諭其志意以其恍惚以與神明交庶或饗之庶或饗之孝子之志也

釋文洞音動屬音獨弗本亦作不勝音升

鄭氏曰脩設謂糞除及黜陟也備其百官奉承而進之百官助主人進之也諭其志意謂使祝祝饗及侑尸也愚謂宮室既脩牆屋既設慮事之豫也百物謂三牲魚腊及邊豆之實百物既備具物之備也上言奉承而進之謂朝踐時下言奉承而進之謂饋熟時也洞洞屬屬以其恍惚以與神明交誠意專一如將見之虛中以治之之驗也

孝子之祭也盡其慤而慤焉盡其信而信焉盡其敬而敬焉盡其禮而不過失焉進退必敬如親聽命則或使之也

盡其愨盡其信盡其敬盡其禮謂存於內者無不盡也  
愨焉信焉敬焉而不過失焉謂著於外者無不盡也孔  
氏曰禮包衆事非一可極故不得云盡其禮云不過失  
則是禮也如或使之如父母或使之也輔氏廣曰愨與  
信皆誠也愨以其固言之信以其實言之

孝子之祭可知也其立之也敬以誦其進之也敬以愉其  
薦之也敬以欲退而立如將受命已徹而退敬齊之色不  
絕於面孝子之祭也

釋文誦求勿反齊如字又側皆反

孝子之祭可知也言觀其祭而可以知其孝也立謂立  
於其位也誦容之俯也進謂進至於尸前也愉色之和  
也薦謂奉物而進之也欲欲親之饗之也退謂反其位  
也如將受命如親之有所教使也誦言其容愉言其色  
欲言其心

立而不誚固也進而不愉疏也薦而不欲不愛也退立而不如受命教也已徹而退無敬齊之色而忘本也如是而祭失之矣

釋文於五親反○鄭注而忘本而衍字

固謂固陋而不知禮也敬齊之色根於心之誠敬而發誠敬之心所以祭祀之本也忘本忘其所以祭祀之本蓋其所根於心者淺而失之速也

孝子之有深愛者必有和氣有和氣者必有愉色有愉色者必有婉容孝子如執玉如奉盈洞洞屬屬然如弗勝如將失之嚴威儼恪非所以事親也成人之道也

鄭氏曰成人既冠者然則孝子不失其孺子之心也愚謂孝子事死如事生其事親於生時者如此故沒而祭之亦必如上文之所言而後可以爲孝也

先王之所以治天下者五貴有德貴貴老敬長慈幼此

五者先王之所以定天下也貴有德何爲也爲其近於道也貴貴爲其近於君也貴老爲其近於親也敬長爲其近於兄也慈幼爲其近於子也是故至孝近乎王至弟近乎霸至孝近乎王雖天子必有父至弟近乎霸雖諸侯必有兄先王之教因而弗改所以領天下國家也

釋文長竹丈反近附近之

近乎王於况反弟音梯

德者行道而有得於心也人有一德雖未必遠盡乎道之全然亦道之所散而見也故曰近乎道霸諸侯之長也事親者仁之實由仁而極之則王者天下一家之心也故曰至孝近乎王從兄者義之實由義而極之則霸者尊主庇民之事也故曰至弟近乎霸天子必有父諸侯必有兄言孝弟之心根於固有不以勢位之尊而有所異也先王囚人心固有之孝弟而教之則天下國家



之人情皆統領於是而不能外矣○項氏安世曰王者君位之極霸者臣位之極霸即伯字諸侯之長也堯舜有四岳夏殷有二伯文武時周召為二伯自孟子荀子明王霸之辨而後學者以霸為羞不知孟荀所闢謂春秋時五霸耳

子曰立愛自親始教民睦也立敬自長始教民順也教以慈睦而民貴有親教以敬長而民貴用命孝以事親順以聽命錯諸天下無所不行

釋文錯干路反

王者無不愛也而愛必自親始王者無不敬也而敬必自長始愛敬自盡其道而其民則而效之則所以教民者在是矣所謂不出家而成教於國也民貴有親則睦矣民貴用命則順矣蓋人莫不有孝順之心我以人之所同然者感之則其聽從之易有不期然而然者矣

郊之祭也喪者不敢哭凶服者不敢入國門敬之至也

說見郊特牲

祭之日君牽牲穆答君卿大夫序從既入廟門麗于碑卿

大夫袒而毛牛尚耳鷩刀以刲取胾膋乃退爛祭祭腥而

退敬之至也

釋文刲若圭反膋音律膋力彫反爛音勳○鄭注序或為豫爛祭祭腥或為合祭腥池腥熟

祭謂祭宗廟也君牽牲者謂二灌後君出迎牲牽之而

入也穆謂主祭者之嗣子也答對也君牽上牲嗣子牽

其次與君相對而牽之也嗣子答君牽牲者以其有傳

重之端也卿大夫序從者卿大夫贊幣士奉芻以次序

從君也禮器曰君親牽牲大夫贊幣而從祭統曰卿大

夫從士執芻是也麗繫也碑在廟之中庭所以為行禮

之節繫牲於其上因其便而用之也毛牛取其毛以告

純也三牲皆然獨言牛者以上牲為主也尚耳以耳毛

純也三牲皆然獨言牛者以上牲為主也尚耳以耳毛

爲尚也鸞刀刀之有鈴者剗割也瘳血也瘳腸間脂也  
取血以告殺又與營並以供熟蕭也乃退殺牲之事畢  
而退也燭沈肉於湯也朝祭之時先祭腥次祭燭而退  
者朝踐之禮畢而退也孔氏曰此腥肉卽禮運云腥其  
俎燭肉卽禮運云熟其殺先云燭者記者文便耳

郊之祭大禘天而主日配以月夏后氏祭其闍殷人祭其  
陽周人祭日以朝及闇

鄭氏曰主日者以其光明天之神可見者莫著焉闇昏  
時也陽讀爲日兩日暘之暘謂口中時也朝日出時也  
夏后氏大事以昏殷人大事以日中周人大事以日出  
孔氏曰周人尚文祭天自朝及闇季氏大夫之家祭禮  
應少而亦以朝及闇故夫子譏之愚謂郊禮於經無可  
考觀禮曰天子乘龍載大旂出拜日於東門之外反祀

方明禮日於南門外禮月與四瀆於北門外禮山川邱  
陵於西門外祀方明以禮天地四方之神蓋略放郊禮  
而爲之者也拜日於東門之外者祭天主日故拜之於  
東門之外以迎其神而禮之也所祀之神非一而獨迎  
日者若鄉飲酒禮主人迎賓而衆賓從之者然也禮日  
於南門外禮月於北門外所謂主日而配以月也祭天  
之禮於天神兼祭日月而不及其餘於此可見矣禮日  
於南門外禮月與四瀆於北門外禮山川邱陵於西門  
外所謂三望者也春秋僖公三十一年四卜郊不從乃  
免牲猶三望傳曰望郊之細也祭天之禮兼及三望此  
所以終日而後畢也天尊可以統地祇故兼祭四瀆及  
山川邱陵周禮掌次祀五帝則張大次小次鄭註云小  
次王接祭退俟之處周禮祭天以朝及闇雖有強力孰

能支之是以退俟與諸臣代有事焉此所以終日行禮而無跛倚之失也與

祭日於壇祭月於坎以別幽明以制上下祭日於東祭月於西以別外內以端其位日出於東月生於西陰陽長短終始相巡以致天下之和

釋文別彼辨反巡依注音浴○按巡今如字

此謂春分朝日秋分夕月之禮也日照於晝為明而壇亦在上而明者也月照於夜為幽而坎亦在下而幽者也祭日於壇祭月於坎別日月之幽明而制其上下之位也東謂東郊西謂西郊端正也位所祭之兆也日為陽陽主外而東方亦陽方也月為陰陰主內而西方亦陰方也祭日於東郊祭月於西郊又因日月之東西以正其外內之位也日生於東日以朝出於東方也月生於西月晦後生明始見於西方也陰謂夜陽謂日夏陽

長而陰短冬陰長而陽短始謂日之朝月之朔終謂日之夕月之晦也巡行也徧也謂其運行周徧代明而不已也以致天下之和者陰陽相濟和氣由此而致也○陳氏祥道曰祀日月之禮有六祭義曰郊之祭大報天而主日配以月一也玉藻曰朝日於東門之外祭義曰祭日於東祭月於西二也小宗伯兆四類於四郊兆日於東郊兆月於西郊三也大司樂樂六變而致天神月令孟冬祈來年於天宗四也覲禮禮日月五也雪霜風雨之不時於是乎祭之六也因郊蜡而祀之非正祀也類祭而祀之與覲諸侯而禮之非常祀也春分朝之於東門外秋分夕之於西門外此祀之正與常也愚謂兆日於東郊兆月於西郊卽春秋分所祭之兆非有二也祭天宗乃秦禮以樂六變而致天神爲蜡祭兼祭日月

鄭氏之誤也去此二祭則祀日月之禮凡有四而惟朝  
日夕月乃其祀之正也

天下之禮致反始也致鬼神也致和用也致義也致讓也  
致反始以厚其本也致鬼神以尊上也致物用以立民紀  
也致義則上下不悖逆矣致讓以去爭也合此五者以治  
天下之禮也雖有奇邪而不治者則微矣釋文去起呂反奇紀宜反

鄭氏曰因祭之義汎說禮也致之言至也使人勤行至  
於此也至於反始謂報天之屬也至於鬼神謂祭宗廟  
之屬也至於和用謂治民之事以足用也物猶事也變  
和言物互文也微少也孔氏曰此一節明禮之大用凡  
五事若行之得理則天下治矣和謂百姓和諧用謂財  
用豐足義謂斷制得宜讓謂遞相推讓反始報天是厚  
重其本祭祀鬼神是尊嚴其上民豐物用則知榮辱禮

節故可以立人紀義能除凶去暴故上下不悖逆奇謂  
奇異邪謂邪惡皆據異行之人合此五者以治天下之  
禮雖有異行不從治者亦當少也事必須和和能立事  
故云互也

宰我曰吾聞鬼神之名不知其所謂子曰氣也者神之盛  
也魄也者鬼之盛也合鬼與神教之至也

鄭氏曰氣謂嘘吸出入者也耳目之聰明爲魄合鬼神  
而祭之此聖人教之至極也朱子曰人之精神知覺與  
夫運動云爲皆是神但氣是充盛發於外者故謂之神  
之盛四肢九竅與夫精血之屬皆是魄但耳目能視聽  
而精明故謂之鬼之盛愚謂鬼神體物不遺程子所謂  
天地之功用造化之迹張子所謂二氣之良能也而夫  
子乃專以氣與魄言之者蓋宰我所問者祭祀之鬼神



故夫子專以其在人身者言之以明報氣報魄之禮所  
由起也○朱子曰子產有言人生始化曰魄既生魄陽  
曰魂孔子曰氣也者神之盛魄也者鬼之盛鄭氏注曰  
噓吸出入者氣也耳目之精明爲魄氣則魂之謂也淮  
南子曰天氣爲魂地氣爲魄高誘注曰魂人陽神也魄  
人陰神也此數說者其於魂魄之義詳矣物生始化云  
者謂受形之初精血之聚其間有靈者名之曰魄也既  
生魄陽曰魂者既生此魄便有暖氣其間有神者名之  
曰魂也二者既合然後有物易所謂精氣爲物是也及  
其散也則魂升而爲神魄降而爲鬼矣又曰陰主藏受  
陽主運用凡能記憶皆魄之所藏受也至於運用發出  
來是魂魄雖各自分屬陰陽然陰陽中又各自有陰  
陽也又曰魂魄是形氣之精英

衆生必死死必歸土此之謂鬼骨內斃于下陰爲野土其氣發揚于上爲昭明焄蒿悽愴此百物之精也神之著也

釋文駢本亦作辨坤世反陰依註音廢於鴉反焄許云反蒿許高反○鄭注蒿或作蕙

鄭氏曰陰讀爲依蔭之蔭言人之骨內陰於地中爲土壤也焄謂香臭也蒿氣蒸出貌上言衆生此言百物明其與人同也不如人貴爾愚謂衆生兼人物而言也陰猶掩也昭明謂其光景之著見也焄蒿謂其香臭之發越也悽愴謂其感動乎人而使人爲之悽愴也骨內之掩於下者魄之降而爲鬼也氣之發揚於上者魂之升而爲神也此皆人物之所同但人爲萬物之靈其魂魄爲尤盛耳

因物之精制爲之極明命鬼神以爲黔首則百衆以畏萬民以服

鄭氏曰明命猶尊名也尊極於鬼神不可復加也黜首謂民也則法也孔氏曰明猶尊也命名也黜黑也凡人以黑巾蒙頭故謂之黜首百衆謂百官衆庶萬民謂天下衆民言聖人因人物之精靈制爲尊極之稱謂之鬼神以爲百姓之法則而天下皆畏敬之也

聖人以是爲未足也築爲宮室設爲宗祧以別親疏遠邇教民復古復始不忘其所由生也衆之服自此故聽且遠也

周於外者謂之宮處於內者謂之室前爲廟謂之宗後爲寢謂之祧古始皆謂祖考也以其已往則曰古以其爲身之所自始則曰始復古復始謂設爲祭祀之禮以追而事之也聖人以明命鬼神其名雖尊而無所以事之之禮則於情爲未足於是立宗廟制祀典使天下之

人莫不有以盡其報本追遠之意而衆莫不服之蓋鬼神之感人而人之欲敬事其祖考乃出於人心之同然而不容已者而聖人因而導之故人莫不服從而速於聽命也

二端既立報以二禮建設朝事燔燎羶薌見以蕭光以報氣也此教衆反始也薦黍稷羞肝肺首心見間以俛無加以鬱鬯以報魄也教民相愛上下用情禮之至也釋文羶依注音

馨見以依注見作醜見間合爲醜字並音醜  
廟之間依古洽反無音武○今按羶讀如字

二端謂鬼也神也二禮報氣報魄之禮也聖人既立爲鬼神之名又設二禮以報之也朝事謂薦血腥也羶薌牛羊腸間脂也羊膏羶牛膏薌見與見間鄭氏皆讀爲覲覲雜也蕭香蒿也蕭光謂蕪之而有火光也燔燎羶薌間以蕭光謂取腓脊燔之而間雜以香蒿之光此饋

食之初尸未入室時也以報氣者血腥與燔燎皆不可  
以飲食而以其氣感神所以報氣之陽也祖考爲人之  
始氣又爲祖考之始故報氣者所以教民反始也薦黍  
稷謂饋熟時也羞謂熟而羞之於俎也肝肺首心皆所  
以共尸祭有虞氏祭首夏后氏祭心殷祭肝周祭肺也  
俎兩也饌所以盛酒者必用兩者以元酒配設也鬯以  
以鬱鬯謂加以祭初鬱鬯之灌也以報魄者黍稷牲酒  
之屬可以飲食而以其味享神所以報魄之陰也薦黍  
稷羞俎實與二灌不同時以其俱所以報魄故合而言  
之教民相愛者飲食之具所以致其相愛之實也主人  
事尸下用情以愛其上尸酢主人上用情以愛其下也  
禮之至者言報氣報魄所以事鬼神之禮此爲至極也

鄭氏曰報氣以氣報魄以實各首其類○孔疏據禮器及郊特牲注謂朝踐饋食皆有燭蕭長樂陳氏草廬吳氏又謂燭蕭專在朝踐時皆非也郊特牲曰既奠然後燭蕭合羶薌奠謂祝酌奠于劔南乃饋熟之始尸在堂行朝踐禮畢未入室時也既奠然後燭蕭則固不當朝踐之節而亦非兩度燭蕭矣陸農師謂既奠謂奠灌爵又非也灌以瓚酌奠以尊角郊特牲舉尊角詔妥尸是也豈可比而一之哉禮器曰君牽牲夫人薦盞君割牲夫人薦酒此云薦黍稷羞肺肝首心間以俠鬴則是諸侯祭惟朝踐獻盞齊而饋食獻以酒矣祭統曰執醴授之執鬴坊記曰醴酒在室醢酒在堂彼得用醴齊醢齊者或上公之禮或大禘禮盛也郊特牲以升首爲報陽謂初殺牲時腥而升之者也此以羞首爲報魄謂有虞

氏祭首熟而升之者也鬱鬯亦為報魄門鬱鬯尸亦飲之明矣

君子反古復始不忘其所由生也是以致其敬發其情竭力從事以報其親不敢弗盡也

致其敬者盡之於心發其情者達之於事竭力從事謂下文所言耕藉巡牲蠶繅之事也

是故昔者天子為藉千畝冕而朱紘躬秉耒諸侯為藉百畝冕而青紘躬秉耒以事天地山川社稷先古以為醴酪

齊盛於是乎取之敬之至也

釋文藉在亦反說文作藉紘音宏齊音咨本亦作齋

藉藉田也天子藉田在南郊諸侯在東郊冕而耕者敬其事也躬秉耒者躬耕三推示親其事也先古先祖也

稷曰明齊盛謂盛之於簋也祭祀兼有黍稷言齊盛者以稷為主也酪酢醢也

古者天子諸侯必有養獸之官及歲時齋戒沐浴而躬朝之犧牲祭牲必於是取之敬之至也君召牛納而視之擇其毛而卜之吉然後養之君皮弁素積朔月月半君巡牲所以致力孝之至也

釋文朝直道反牲音全

養獸之官謂充人也周禮充人掌繫祭祀之牲牲配五帝則繫于牢芻之三月享先王亦如之歲時謂每歲依時也色純曰犧體具曰牲君召牛以下覆明上文之事也納而視之謂納於牧人而視之也擇其毛謂擇其完具而不雜者也卜謂祭前三月卜牲也牲之未卜者養於牧人既卜而後養之於充人也朔月月半卽上文所謂歲時也巡牲卽上文所謂齋戒沐浴而躬朝之蓋以察其芻豢之肥瘠也皮弁素積天子視朝之服也以視朝之服巡牲敬其事也天子以皮弁則諸侯以朝服也



君不可自養牲每月巡視之亦所以自致其力也於耕藉言敬之至於養牲言孝之至互相明也

古者天子諸侯必有公桑蠶室近川而爲之築宮仞有三尺棘牆而外閉之及大昕之朝君皮弁素積卜三宮之夫人世婦之吉者使入蠶于蠶室奉種浴于川桑于公桑風戾以食之歲既單矣世婦卒蠶奉繭以示于君遂獻繭于夫人夫人曰此所以爲君服與遂副禕而受之因少牢以禮之古之獻繭者其率用此與及良日夫人縹二盆手遂布于三宮夫人世婦之吉者使纁遂朱綠之玄黃之以爲黼黻文章服既成君服以祀先王先公敬之至也

近昕許斤反奉芳勇反種章勇反食音嗣單音丹與音餘禕音暉率音類又音律又所律反

釋文近附近之

鄭氏曰大昕季春朔日之朝也諸侯夫人三宮半王后也風戾之者及早涼脆採之風戾之使露氣燥乃以食

蠶蠶性惡溼也歲單謂三月月盡之後也言歲者蠶歲之大功事畢於此也副禕王后之服而云夫人容二王之後與禮之禮奉繭之世婦也三盆手者三淹也凡繅每淹大總而手振之以出緒也孔氏曰公桑蠶室者謂官家之桑於其處而築養蠶之室也近川而爲之取其浴蠶種便也築宮謂築養蠶宮牆七尺曰仞仞有三尺牆高一丈也棘牆牆上置棘外閉謂扇在門外閉也大昕之朝季春朔日之朝也諸侯夫人半王后故三宮世婦諸侯之世婦此雜互天子之禮言之天子有三夫人若諸侯唯有世婦也養蠶非一人唯云世婦之吉者擇其吉者以爲主領也奉種浴于川者初於仲春時已浴之至蠶將生之時又浴之也辰乾也風辰以食之者凌早采桑必帶露而溼蠶性惡溼故乾而食之單盡也歲

既畢謂三月之末四月之初盥是婦人之事故獻繭于  
夫人擬爲君之祭服故夫人首著副身著禕衣受此所  
獻之繭少牢以禮之接獻繭之世婦也良日吉日也更  
擇吉日以至而後夫人自纁也三盆手者猶三淹也每  
淹以手振出其絲故曰三盆手婦人不與外祭故云以  
祀先王先公其實養蠶爲衣亦事天地山川社稷陳氏  
滯曰三盆手者置繭於盆中而以手三次淹之每淹則  
以手振出其緒也愚謂切說文云伸臂一尋八尺是也  
考工記匠人爲溝洫井間廣四尺深四尺謂之溝成間  
廣八尺深八尺謂之洫同間廣二尋深二仞謂之澮溝  
洫之廣深同則澮之廣深亦同是二仞卽二尋也但古  
人言廣者多曰尋言高深者多曰仞若七尺曰仞則此  
仞有三尺言一丈可矣何必繁其辭乎

君子曰禮樂不可斯須去身致樂以治心則易直子諒之心油然而生矣易直子諒之心生則樂樂則安安則久久則天天則神天則不言而信神則不怒而威致樂以治心者也致禮以治躬則莊敬莊敬則嚴威心中斯須不和不樂而鄙詐之心入之矣外貌斯須不莊不敬而慢易之心入之矣故樂也者動於內者也禮也者動於外者也樂極和禮極順內和而外順則民瞻其顏色而不與爭也望其容貌而衆不生慢易焉故德輝動乎內而民莫不承聽理發乎外而衆莫不承順故曰致禮樂之道而天下塞焉舉而錯之無難矣樂也者動於內者也禮也者動於外者也故禮主其減樂主其盈禮減而進以進爲文樂盈而反以反爲文禮減而不進則銷樂盈而不反則放故禮有報而樂有反禮得其報則樂樂得其反則安禮之報樂之反其義

一也

說已見樂記

曾子曰孝有三大孝尊親其次弗辱其下能養

釋文養羊  
尙反後同

孔氏曰大孝尊親卽下文大孝不匱聖人爲天子者也

尊親嚴父配天也其次弗辱謂賢人爲諸侯卿大夫士

各保社稷宗廟祭祀不使傾危以辱親也卽下文中孝

用勞也其下能養謂庶人也與下文小孝用力爲一能

養謂因天分地以養父母也黃氏裳曰自天子至庶人

孝道有三立身行道有大功大德俾人頌美其先而尊

重之上也生事葬祭之以禮全父母遺體沒身無毀者

次也事父母盡其色養者下也愚謂下文言小孝用力

中孝用勞大孝不匱以位之尊卑而異者也此言大孝

尊親其次弗辱其次能養以行之優劣而分者也蓋大

孝之極非天子之博施備物固不足以盡之然即大夫士而言其孝亦未嘗不有大小焉亨熟羶鄉嘗而薦之此僅能養而已者也使國人稱願然曰幸哉有子如此此則能尊親者也

公明儀問於曾子曰夫子可以爲孝乎曾子曰是何言與

是何言與君子之所謂孝者先意承志諭父母於道參直

養者也安能爲孝乎

釋文與音餘先悉薦反

諭猶曉也善承父母之意能諭之於道益非大舜之得親順親不足以當此直但也

曾子曰身也者父母之遺體也行父母之遺體敢不敬乎居處不莊非孝也事君不忠非孝也泄官不做非孝也朋友不信非孝也戰陳無勇非孝也五者不遂裁及於親敢不敬乎

釋文蒞音利本又作泄陳直觀反

方氏愨曰身者父母之遺體五者不遂則裁及其身裁及其身是及其親也豈孝也哉

亨熟羶薌嘗而薦之非孝也養也君子之所謂孝也者國人稱願然曰幸哉有子如此所謂孝也已衆之本教曰孝其行曰養養可能也敬爲難敬可能也安爲難安可能也卒爲難父母旣沒慎行其身不遺父母惡名可謂能終矣仁者仁此者也禮者履此者也義者宜此者也信者信此者也強者強此者也樂自順此也刑自反此作

釋文亨善彭反遺如

如字又于計反

方氏愨曰論語云不敬何以別故敬爲難揚子曰孝莫大於甯親故安爲難孝經曰立身行道揚名於後世以顯父母孝之終也故卒爲難愚謂衆之本教曰孝言聖人之教衆人其根本在於孝也其行曰養者言孝之見

於行事之實者謂之養也養固未足以盡孝而孝未有  
離乎養者故首以此言之而遞推之以及其至焉曰養  
曰安曰卒皆事親之事也卒則守身之事也能以守身  
爲事親則其爲孝也大矣仁此以下七此字皆指孝而  
言仁禮義信強五者之德無所不在而無非所以成其  
孝也順乎此則樂而至於手舞足蹈樂之所以生也反  
乎此則三千之罪莫大刑之所以作也

曾子曰夫孝置之而塞乎天地溥之而橫乎四海施諸後  
世而無朝夕推而放諸東海而準推而放諸西海而準推  
而放諸南海而準推而放諸北海而準詩云自西自東自  
南自北無思不服此之謂也

釋文瀕本亦作  
敷放甫往反

方氏慙曰置謂直而立之溥謂敷而散之施謂其出無  
窮推謂其進不已愚謂孝之德本乎天地協乎人心無



古今之殊無遠近之異此所以置之薄之施之推之而無所不同也放至也

曾子曰樹木以時伐焉禽獸以時殺焉夫子曰斷一樹殺

一獸不以其時非孝也

釋文斷丁管反

夫子曰以下曾子述孔子之言也君子親親而仁民仁

民而愛物故由愛親之心而推之則雖一物之微有不

可不愛者而況其大焉者乎

孝有三小孝用力中孝用勞大孝不匱思慈愛忘勞可謂

用力矣尊仁安義可謂用勞矣博施備物可謂不匱矣

施始文釋

鄭氏曰勞猶功也愚謂不匱言其所及者遠而所致者

大也思父母之慈愛而忘其躬耕之勞庶人之孝也尊

仁安義則體不虧而名不辱士大夫之孝也博施謂德

教加於四海刑於百姓備物謂天地之間可薦者無不  
咸在人君之孝也

父母愛之喜而弗忘父母惡之懼而無怨父母有過諫而  
不逆父母既沒必求仁者之粟以祀之此之謂禮終

釋文惡鳥

反路

雖困窮不能備祭禮然猶不敢苟取以事其親則其平  
日之謹身守道可見矣禮終所謂能卒也此言中孝用  
勞之事蓋君子既不能為不匱之孝又不可止為用力  
之孝所當自勉者用勞而已黃氏曰粟者祿也父母既  
沒必仕於仁諸侯賢大夫之朝立身行道以終祭祀恐  
辱先也

樂正子春下堂而傷其足數月不出猶有憂色門弟子曰  
夫子之足瘳矣數月不出猶有憂色何也樂正子春曰善

如爾之問也善如爾之問也吾聞諸曾子曾子聞諸夫子  
 曰天之所生地之所養無人為大父母全而生之子全而  
 歸之可謂孝矣不虧其體不辱其身可謂全矣故君子頃  
 步而弗敢忘孝也今予忘孝之道予是以有憂色也壹舉  
 足而不敢忘父母壹出言而不敢忘父母壹舉足而不敢  
 忘父母是故道而不徑舟而不游不敢以先父母之遺體  
 行殆壹出言而不敢忘父母是故惡言不出於口忿言不  
 反於身不辱其身不羞其親可謂孝矣釋文頃讀為跣缺  
 掉反又邱弭反  
 天地之間無人為大以其全天地之心而為萬物之靈  
 也父母全而生之子全而歸之蓋無媿於天地然後能  
 無忝於父母也頃當作跣字亦作頃荀子曰不積頃步  
 無以致千里徑步邪趨疾也游川行也言悖而出者亦  
 悖而入惡言不出於口則忿言不反於身矣○自曾子

曰孝有三至此明孝之道而多爲曾子之言其義與孝經相爲表裏

昔者有虞氏貴德而尚齒夏后氏貴爵而尚齒殷人貴富而尚齒周人貴親而尚齒虞夏殷周天下之盛王也未有遺年者年之貴乎天下久矣次乎事親也

方氏慤曰四代之所貴不同由救弊之政異也貴德之弊至於忘君故夏后氏救之以貴爵貴爵所以明貴賤也貴爵之弊至於忘功故殷人救之以貴富貴富所以明世祿也三者之弊至於忘親故周人救之以貴親愚謂左傳曰周之宗盟異姓爲後周禮王天揖同姓時揖異姓土揖庶姓周人之尚親者然也貴與尚皆尊之也四代之所貴不同而無不尚齒者言各於其所貴之中而又皆以齒爲尚也

是故朝廷同爵則尚齒七十杖於朝君問則席八十不俟

釋文朝直遙反弟音悌後皆同

朝君問則就之而弟達乎朝廷矣

鄭氏曰同爵尚齒老者在上也君問則席為之布席於

堂上而與之言凡朝位立於庭不俟朝君揖之即退不

待朝事畢也就之就其家也老而致仕君或不許異其

禮而已孔氏曰此經所云是君不許致事者故七十杖

於朝君問則席八十不俟朝君問則就之若許致事則

王制云七十不俟朝八十杖於朝愚謂席謂席於路寢

之堂也凡朝君既揖羣臣退適路寢聽政卿大夫亦就

治朝左右而治事君有疑召而問之則入至路寢之堂

若七十者則君命為之布席而使之坐焉所以優禮之

也卿大夫在朝皆待治事畢而後退八十不俟朝謂不

待朝事畢而先退君有疑則使人就其家而問之彌優

之也

行肩而不併不錯則隨見老者則車徒辟斑白者不以其

任行乎道路而弟達乎道路矣

釋文併步頂反徐扶頂反辟音避

鄭氏曰錯雁行也父黨隨行兄黨雁行斑白髮雜色也

孔氏曰行肩而不併者謂老少並行少者差退在後肩

臂不得相併則朋友肩隨是也不錯則隨者若兄黨則

為雁行之參錯若父黨則隨從而在後也見老者則車

徒辟謂少者或乘車或徒步逢老者則辟之任謂擔持

斑白者不以其任行乎道路少者必代之也

居鄉以齒而老窮不遺強不犯弱眾不暴寡而弟達乎州

巷矣

釋文遺本又作匯

鄭氏曰老窮不遺以鄉人尊而長之雖貧且無子孫無

棄忘也一鄉者五州巷猶閭也

古之道五十不爲甸徒頒禽隆諸長者而弟達乎獫狁矣

釋文甸田見反搜本又作  
度音蒐○今按甸讀爲田

甸讀爲田周禮小宗伯若大甸則帥有司而饗獸于郊  
肆師凡師甸用牲于社宗則爲位是也小司徒凡起徒  
役毋過家一人以其餘爲羨唯出與追胥竭作五十不  
爲甸徒免於竭作之役也頒分也隆多也頒禽隆諸長  
者謂未五十而與於田役者則計其年之長者而多與  
之禽也

軍旅什伍同爵則尙齒而弟達乎軍旅矣

什伍謂士卒部曲也五人曰伍二伍曰什

孝弟發諸朝廷行乎道路至于州巷放乎獫狁脩乎軍旅  
衆以義死之而弗敢犯也

吳氏澄曰朝廷政令所自出故先言之道路民所行州

巷民所居，獫狁用衆於內，軍旅用衆於外，義謂所宜行。衆人以孝弟爲所宜行，故甯死而不敢犯不孝不弟之事也。

祀乎明堂，所以教諸侯之孝也。食三老五更於大學，所以教諸侯之弟也。祀先賢於西學，所以教諸侯之德也。耕藉所以教諸侯之養也。朝覲，所以教諸侯之臣也。五者，天下之大教也。

釋文：食音嗣，更古。衡，反。大音泰，下同。

祀乎明堂，宗祀文王於明堂，以配上帝也。大學成均也。先賢，謂學之先師也。西學，瞽宗也。祀先賢於西學，周禮大司樂掌成均之法，有道者有德者，使教焉。死則以爲樂祖，祭于瞽宗是也。先賢有德尊而祀之於學，所以教諸侯使自勉於德也。周氏謂曰：先王之教也，豈必諄諄然命之哉？禮行於此而人自得於彼者，乃教之至也。



食三老五更於大學天子袒而割牲執醬而饋執爵而醕  
冕而總干所以教諸侯之弟也是故鄉里有齒而老窮不  
遺強不犯弱衆不暴寡此由大學來者也

由大學來者言由天子躬行尚齒之教於大學故天下  
化之而孝弟無所不達也

天子設四學當入學而大子齒

天子立四學周制也周立四代之學虞庠在北瞽宗在  
西東序在東而當代之學居中南面謂之成均齒謂與  
學士以年齒爲次序也

天子巡守諸侯待于竟天子先見百年者釋文守手又反  
本亦作狩竟居

頌

百年者齒之最尊者也天子巡守諸侯待于竟天子未  
見諸侯而先見百年者急於致敬而不敢稍緩也

八十九十者東行西行者弗敢過西行東行者弗敢過欲言政者君就之可也

八十九十者齒之尊次乎百年者也其行乎道路之中若東行則西行之人皆駐立以待之而不敢過若西行則東行之人皆駐立以待之而不敢過也前言見老者則車徒辟謂辟之而旁行也此遇之而弗敢過則不但辟之而已君就之謂君親就其家也前云八十不俟朝有問焉則就之謂不許致仕者也此云欲言政者君就之謂已致仕者也

先  
壹命齒于鄉里再命齒于族三命不齒族有七十者弗敢

壹命齒于鄉里再命齒于族三命而不齒此周禮黨正職之文據天子之國蜡祭正齒位禮言之也天子下士

一命中士再命上士三命齒於鄉里謂與其同鄉里之人以年齒爲次序也族同高祖之親也齒於族謂與其同族之人以年齒爲次序也不齒謂雖有同族之人不與之計年齒也弗敢先不敢先之而入也雖有三命之尊然猶不敢先七十者而入所以深明七十者之尊也鄭氏曰不復齒席之於賓東不敢先謂既一人舉觴乃入也雖非族亦然承齒乎族故言族爾熊氏安生曰黨正飲酒正齒位故有七十者若鄉飲酒之禮則無七十者故鄉飲酒明日乃息司正告于先生君子是老者明日乃入也葉氏夢得曰三命不齒貴貴也七十者不敢先長長也先王之道其並行而不悖者如此○此據周禮黨正之文三命不齒者天子之上士也鄉飲酒禮據諸侯之國故云諸公大夫皆席於賓東三等之國卿或

三命或再命大夫或再命或一命而皆席於賓東是卿大夫皆不齒不以命數爲限也鄉飲酒雖據賓賢能之禮其實黨正正齒位亦然孔疏謂列國鄉飲酒卿大夫皆得不齒黨正正齒位三命乃不齒非也正齒位之禮六十者坐五十者立於堂下諸侯之黨正士也若子男之國正齒位之禮黨正坐於堂上爲主人而其卿再命大夫一命反位於堂下可乎

七十者不有大故不入朝若有大故而入君必與之揖讓

而后及爵者

釋文朝直通反

此謂致仕在家者也大故謂兵寇讓猶辭也君既先揖之則辭讓令退不欲久勞之也○自有虞氏貴德而尚齒至此明弟長之義

天子有善讓德於天諸侯有善歸諸天子卿大夫有善薦

於諸侯士庶人有善本諸父母存諸長老祿爵慶賞成諸

宗廟所以示順也

釋文長竹丈反

鄭氏曰薦進也成諸宗廟於宗廟命之孔氏曰有善讓於尊上以示敬順之道不敢專也

昔者聖人建陰陽天地之情立以為易易抱龜南面天子

卷冕北面雖有明知之心必進斷其志焉示不敢專以尊

天也善則稱人過則稱己教不伐以尊賢也

釋文卷古本反知音智斷

丁亂反

建立也天地言其體陰陽言其氣情謂吉凶之著見也

易謂卜筮之書也周禮卜有三兆筮有三易此言易而

不言兆下言抱龜而不言著皆互相備也易抱龜南面

此易謂卜筮之官也按士冠禮特牲少牢筮日主人與

筮者皆西面士喪禮卜日主人北面而卜者席于闈西

闕外則西面此卜者南一天子北面蓋卜郊之禮與特牲禮筮日主人元端少牢禮筮日朝服是卜筮祭日者皆用其祭之服此云天子衮冕蓋十二章之冕服也此因上言天子讓善於天因舉卜筮一事以見聖人之尊天又因聖人之尊天而言聖人之尊賢皆所以教天下以謙讓之德也○此上二節又因弟長之意而推廣言之

孝子將祭祀必有齊莊之心以慮事以具服物以脩宮室以治百事及祭之日顏色必溫行必恐如懼不及愛然其奠之也容貌必溫身必訕如語焉而未之然宿者皆出其立卑靜以正如將弗見然及祭之後陶陶遂遂如將復入然是故慤善不違身耳目不違心思慮不違親結諸心形諸色而術省之孝子之志也

釋文齊傳皆反語無御反陶音遙遂本又作燒思息嗣反

術義作述○  
今按陶如字

顏色必溫者爲親之將饗之而和顏以承之也行必恐  
如懼不及愛然者又恐親之不果饗而不及致其愛親  
之心也此謂初祭時也奠之謂奠置祭饌於神前也容  
貌必溫身必誦者爲親之已饗而若受命於其前也如  
語焉而未之然如親之將語己而猶未語然此皆謂正  
祭時也宿者謂助祭之賓也助祭之賓於祭前必宿之  
宿者皆出謂祭畢而出也祭畢而親往故其立卑靜以  
正如將弗復見親而致其送之之意也陶如鬱陶之陶  
陶陶思之結於中也遂遂思之達於外也如將復入然  
者思之深而如親將復入也行必恐身必誦立必卑靜  
以正者身容之慤也顏色容貌必溫者身容之善也術  
與述同思慮不違親故結諸心而發於耳目耳目不違

心故形諸色而著爲熬善術則循乎熬善者而無所違也省則察乎熬善者而不敢失也

建國之神位右社稷而左宗廟

右路門外之西左路門外之東也陳氏祥道曰宗廟陽也故居左社稷陰也故居右戴氏震曰聘禮曰公出送賓及大門內周官司儀曰出及中門之外廟在中門內明矣春秋桓宮僖宮災火自司鐸踰公宮至桓僖二廟廟邇公宮也季桓子至御公立於象魏之外立當遠火也春秋穀梁傳曰禮送女父不下堂母不出祭門諸母兄弟不出闕門廟門謂之祭門雉門謂之闕門闕門在外祭門在內不出闕門者得出祭門者也春秋左氏傳曰間于兩社爲丕室輔以朝廷執政所在爲言宜繫君臣日見之朝社在中門內明矣愚謂縣之詩曰乃立皋



門臯門有仇乃立應門應門將將乃立冢土戎醜攸行  
冢土大社也君子將營宮室宗廟爲先此詩上章先言  
作廟此章乃以自外及內之序言之首作臯門次作應  
門次立社稷社稷與宗廟左右相對天子在應門內諸  
侯在雉門內曉然可見矣

禮記卷四十七

賜進士及第翰林院編脩 國史館纂脩孫希旦集解

祭統第二十五

別錄屬  
祭祀

統猶本也祭有物有禮有樂有時而其本則統於一心故以祭統名篇篇中凡五段首言祭禮之重又自未祭之先以及於祭末次第言之而皆歸本於心之自盡以明祭統之義次言祭有十倫又次言祭有四時皆以申首段未盡之義也又次言鼎銘又次言魯賜重祭又因祭祀致敬而廣其義也

凡治人之道莫急於禮禮有五經莫重於祭

鄭氏曰禮有五經謂吉凶賓軍嘉也其重於祭以吉禮爲首也

夫祭者非物自外至者也自中出生於心也心怵而奉之

以禮是故唯賢者能盡祭之義

釋文怵敕律反。鄭注怵或作述。

陳氏澹曰怵卽前篇必有怵惕之心謂心有感動也愚謂物猶事也冠昏賓客之禮皆先有其事於外而後以我之心應之唯祭則不然乃由思親之心先動於中而後奉之以禮此祭之義也若無思親之實心則不足以盡乎祭之義矣

賢者之祭也必受其福非世所謂福也福者備也備者百順之名也無所不順者之謂備言內盡於己而外順於道也忠臣以事其君孝子以事其親其本一也上則順於鬼神外則順於君長內則以孝於親如此之謂備唯賢者能備能備然後能祭是故賢者之祭也致其誠信與其忠敬奉之以物道之以禮安之以樂參之以時明薦之而已矣不求其爲此孝子之心也

釋文長竹丈反道之音導爲于僞反

輔氏廣曰必受其福以理必之世所謂福則不可必也  
名猶名言之名猶言備者百順之謂而已內盡於己外  
順於道則仰不愧天俯不忤人心安體胖是賢者之所  
謂福也鄭氏曰其本一者言忠孝俱由順出也愚謂順  
於鬼神以事死言孝於其親以事生言能備則以事鬼  
神事君長事其親而無乎不順也誠信忠敬所謂內盡  
於己也時謂一歲四祭不煩不怠也奉之以物至參之  
以時所謂外順於道也爲謂鬼神之佑助益賢者之祭  
有得福之理而無求福之心也

祭者所以追養繼孝也孝者畜也順於道不逆於倫是之

謂畜

釋文養羊尙反  
下同畜許六反

孔氏曰親沒而祭之追生時之養繼生時之孝也畜謂  
畜養愚謂順於道謂立身行道而能論諸其親也不逆

於倫謂承順乎親而於倫理無所忤也不逆於倫者得親之謂順於道者順親之謂

是故孝子之事親也有三道焉生則養沒則喪喪畢則祭

養則觀其順也喪則觀其哀也祭則觀其敬而時也盡此

三道者孝子之行也

釋文行下孟反

內盡於己則有誠信忠敬舉敬以見誠信與忠外盡於道則有禮樂物時舉時以見物與禮樂也

既內自盡又外求助昏禮是也故國君取夫人之辭曰請君之玉女與寡人共有敝邑事宗廟社稷此求助之本也

釋文取七住反

取夫人之辭謂納采之辭也鄭氏曰玉女者美言之君子於玉比德焉

夫祭也者必夫婦親之所以備外內之官也官備則具備

水草之菹陸產之醢小物備矣三牲之俎八簋之實美物備矣昆蟲之異草木之實陰陽之物備矣凡天之所生地之所長苟可薦者莫不咸在示盡物也外則盡物內則盡志此祭之心也

官猶職也具祭饌也具備謂君割牲夫人薦籩豆之屬也水草之菹若周禮醢人茆菹芹菹之屬陸產之醢若醢人鹿麋麩蕪之屬陸產亦謂之小物者以其莖之以爲醢非體骨之全也簋盛黍稷祭用八簋天子之禮也昆蟲之異若醢人蜃醢麇醢之屬草木之實若邊人蔞芡榛棗之屬也祭祀之具莫非陰陽之氣所生獨於昆蟲草木言陰陽之物者言其如是而後備也此一節申言奉之以物也

是故天子親耕於南郊以共齊盛王后蠶於北郊以共純

服諸侯耕於東郊亦以共齊盛夫人蠶於北郊以共冕服天子諸侯非莫耕也王后夫人非莫蠶也身致其誠信誠信之謂盡盡之謂敬敬盡然後可以事神明此祭之道也

釋文齊本亦作齋與棗同音咨純側其反下純冕亦同○鄭注齊或爲棗

此及下節皆承內則盡志而言鄭氏曰純服亦冕服也互言之爾純以見緇色冕以著祭服東郊少陽諸侯象也夫人不蠶於西郊婦人禮少變也

及時將祭君子乃齊齊之爲言齊也齊不齊以致齊者是故君子非有大事也非有恭敬也則不齊不齊則於物無防也者欲無止也及其將齊也防其邪物訖其者欲耳不聽樂故記曰齊者不樂言不敢散其志也心不苟慮必依於道手足不苟動必依於禮是故君子之齊也專致其精明之德也故散齊七日以定之致齊三日以齊之定之

之謂齊齊者精明之至也然後可以交於神明也

釋文齊也齊不

齊以致齊以齊之  
並如字餘例皆反

齊之爲言齊言齊一也大事謂祭祀之事也恭敬則以  
其心言之蓋亦有非祭祀而致其恭敬者如齊戒以見  
君是也物自外至故曰防者欲自內出故曰止防其邪  
物者謂若不飲酒不茹葷之類酒與葷不可謂之邪物  
然於齊時則不當飲不當食雖謂之邪物可也訖亦止  
也訖其耆欲謂不御也君子未嘗苟慮苟動特於齊尤  
致其慎爾定之之謂齊申言散齊以定之齊者精明之  
至申言致齊以齊之也

是故先期旬有一日宮宰宿夫人夫人亦散齊七日致齊  
三日君致齋於外夫人致齋於內然後會於大廟君純冕  
立於阼夫人副褱立於東房君執圭瓊裸尸大宗執璋瓊



亞裸及迎牲君執紉卿大夫從士執芻宗婦執盎從夫人

薦浼水君執鸞刀羞嗜夫人薦豆此之謂夫婦親之釋文

薦反又加字大廟音黍下同紉以忍反從才用反

鄭氏曰宿讀為肅肅猶戒也戒輕肅重也愚謂先期旬

有一日者容散齊七日致齊三日也周禮大宰職前期

十日帥執事而卜日遂戒彼不數祭日故云十日此兼

數祭日故云旬有一日也宮宰內宰也外君之正寢內

夫人之正寢也大廟大祖之廟也純冕純衣而冕服也

立於阼謂初入卽位時也瑱裸器以圭璋為之柄大宗

大宗伯也半圭曰璋諸侯祭禮夫人亞君而裸此既云

夫人副禕又云大宗執璋瓚亞裸者容夫人有故則宗

伯擯而裸獻也紉牛鼻繩君親牽牲故執紉卿大夫從

者或驅牲或執幣以供告殺也芻藁也殺牲則以芻藁

藉之故士執之以從也宗婦同宗之婦也盎盎齊也薦  
獻也說卽盎也盎齊曰說酌水明水也獻尸用齊而不  
用明水因明水配齊而設故并言說水也宗婦執盎從  
者謂於夫人獻尸之時宗婦執盎以從之也主人與主  
婦獻尸併獻祝與佐食故夫人執盎齊獻尸宗婦執獻  
祝與佐食之爵以從夫人周禮外宗職王后以樂羞盞  
則贊凡王后之獻亦如之是也特牲禮主婦獻尸宗婦  
不贊少牢禮雖有婦贊者受爵然獻祝及佐食皆主婦  
自洗酌於房中夫人則宗婦實盎於爵以從尊卑之禮  
異也羞進也嘏謂俎實也特牲少牢禮尸舉肺及牲體  
皆振祭嘏之故謂俎實爲嘏也此一節申言道之以禮  
也

及入舞君執干戚就舞位君爲東上冕而總干率其羣臣

以樂皇尸是故天子之祭也與天下樂之諸侯之祭也與  
竟內樂之冕而總干率其羣臣以樂皇尸此與竟內樂之  
之義也

釋文樂並音洛竟音境篇內皆同

鄭氏曰君爲東上近主位也皇君也言君尸者尊之屬  
謂君執干戚就舞位所謂朱干玉戚以舞大武也舞有  
文武獨言干戚者以武舞爲重也冕而總干象武王之  
總干山立也朱干玉戚以舞大武此天子之禮兼云諸  
侯者據魯禮言之也與天下樂之得萬國之歡心以事  
其先王也與竟內樂之得一國之歡心以事其先君也  
此一節中言安之以樂也

夫祭有三重焉獻之屬莫重於禋聲莫重於升歌舞莫重  
於武宿夜此周道也凡三道者所以假於外而以增君子  
之志也故與志進退志輕則亦輕志重則亦重輕其志而

求外之重也雖聖人弗能得也是故君子之祭也必身自  
盡也所以明重也道之以禮以奉三重而薦諸皇尸此聖  
人之道也

釋文獻之屬一  
本無之屬二字

升歌謂升歌清廟也大武之第一成謂之武宿夜象武  
王之師次孟津而宿也禠者獻之始升歌者聲之始武  
宿夜者舞之始天子祭禮十二獻上公九獻侯伯七子  
男五而禠爲重聲有下管間歌而升歌爲重武有六成  
而武宿夜爲重志卽上所謂誠信忠敬也有誠信忠敬  
之志則能自盡矣此一節又因祭之用禮樂而歸本於  
自盡之義也

夫祭有餞餞者祭之末也不可不知也是故古之人有言  
曰善終者如始餞其是已是故古之君子曰尸亦餞鬼神  
之餘也惠術也可以觀政矣是故尸諷君與卿四人餞君

起大夫六人餼臣餼君之餘也大夫起士八人餼賤餼貴之餘也士起各執其具以出陳于堂下百官進徹之下餼上之餘也凡餼之道每變以象所以別貴賤之等而興施惠之象也是故以四簋象見其脩於廟中也廟中者竟內之象也祭者澤之大者也是故上有大澤則惠必及下願上先下後耳非上積重而下有凍餒之民也是故上有大澤則民夫人待于下流知惠之必將至也由餼見之矣故曰可以觀政矣

釋文百官進依法作餼別後列反見其賢通反修一本作編重直龍反見之如字

食餘曰餼鬼神享氣朝踐時先薦腥爛至饋食尸乃食之故曰尸亦餼鬼神之餘祭之餼以上之所食者逮及於下此施惠之道也爲政在於施惠故於餼可以觀政也謬起也君與卿四人餼君與三卿也文王世子曰其登餼獻受爵則以上嗣此君自與卿餼蓋未立世子者

之禮與大夫士衆多其六人八人餞者皆有事於廟中者也特牲禮以長兄弟爲下養少牢禮以二佐食養則非有事於廟中者不得餞可見矣士起各執其具以出者士旣餞畢各執其所餞之盥劍以出於室也百官謂餘士之無事於廟者也進當作餞餞徹言旣餞而遂徹之也餞之道每變以衆旣以爲貴賤之別而又以象其惠之漸廣也盥盛黍稷之器也特牲禮二敦以一敦餞留一敦爲陽厭少牢禮四敦以二敦餞留二敦爲陽厭又少牢禮二佐食養司士進一敦黍於上佐食又進一敦黍於下佐食則是餞皆以黍矣蓋尸食黍而不食稷餞宜以尸之所食者也諸侯六盥黍惟三盥此得有四盥黍者蓋別用一盥分之六人餞則遞分爲六盥八人餞則遞分爲八盥若特牲禮佐食分盥劍之爲也脩整

治也廟中者竟內之象者鬼神之惠徧於廟中猶君之惠徧於竟內也

夫祭之為物大矣其興物備矣順以備者也其教之本與是故君子之教也外則教之以尊其君長內則教之以孝於其親是故明君在上則諸臣服從崇祀宗廟社稷則子孫順考盡其道端其義而教生焉是故君子之事君也必身行之所不安於上則不以使下所惡於下則不以事上非諸人行諸亡非教之道也是故君子之教也必由其本順之至也祭其是與故曰祭者教之本也已釋文長竹丈反惡鳥路反為物猶為禮也備以物言順兼心與禮言人君教民之事非一而盡禮於祭祀者乃其本也祭祀事尸如事君所以教民尊其君長也追養繼孝所以教民孝於其親也教之以尊其君長則諸臣服從教之以孝於其親則

子孫順孝盡其道以下皆以明設教之必本於身也

夫祭有十倫焉見事鬼神之道焉見君臣之義焉見父子之倫焉見貴賤之等焉見親疏之殺焉見爵賞之施焉見夫婦之別焉見政事之均焉見長幼之序焉見上下之際焉此之謂十倫

釋文見並賢編反殺色界反

倫謂義禮之次序也

鋪筵設同几爲依神也詔祝於室而出于祊此交神明之

道也

釋文爲于偽反

鋪筵設同几謂祭以某妃配而同鋪一筵同設一几也

特言同几者几小筵大几同則筵可知爲依神者言所以依神者異於生人也詔祝於室所謂血毛詔於室出于祊所謂爲祊於外也蓋生時形體異故男女別筵死時精氣合故男女同几生人有象可接故事之有定所



死則不知神之所在故求之非一處此二者皆所以交神明之道也

君迎牲而不迎尸別嫌也尸在廟門外則疑於臣在廟中則全於君君在廟門外則疑於君入廟門則全於臣全於子故不出者明君臣之義也

鄭氏曰不迎尸者欲全其尊也尸神象也鬼神之尊在廟中人君之尊出廟門則伸愚謂君出迎尸則君屈於臣故不出者所以全君之尊而君臣之義所以明也

夫祭之道孫為王父尸所使為尸者於祭者子行也父北面而事之所以明子事父之道也此父子之倫也

徐胡孟反

釋文行尸剛反

尸用所祭者之孫無孫則取族中孫行者為之以其昭穆同也此據祭考廟而言之故尸於主祭者為子行主

祭者於尸爲諸父也北面而事之者天子諸侯之禮朝踐時尸在堂上南面主人北面而事之也

尸飲五君洗玉爵獻卿尸飲七以瑤爵獻大夫尸飲九以散爵獻士及羣有司皆以齒明尊卑之等也

蓋凡禮記言諸侯之祭多據魯禮此謂上公九獻者也尸飲五者裸獻二朝獻二至饋食主人獻尸而爲五也夫人又獻尸而爵止君乃以玉爵獻卿玉爵獻尸所用之爵以玉爲飾者以玉爵獻卿因獻尸之爵也尸飲七者尸作止爵及食畢君醕尸而爲七也既則夫人又醕尸而爵止君乃以瑤爵獻大夫也瑤爵醕尸所用之爵以瑤爲飾者周禮內宰職曰后之裸獻則贊瑤爵亦如之鄭氏云瑤爵后醕尸之爵是也以瑤爵獻大夫亦因醕尸之爵也尸飲九者尸作止爵飲之賓長又醕尸而

爲九也既則也兄弟爲加爵而爵止君乃以散爵獻士也五升曰散以璧飾之爲加爵者用璧散明堂位曰加以璧散璧角是也以散爵獻士亦用獻尸之爵也獻士謂獻士之有事於廟者也羣有司衆士也皆以齒同爵則尙齒也特牲禮賓長以下同以三獻爵止後獻之此獻卿大夫士不同時者人君之臣尊卑殊故其尊者先獻之卑者後獻之是明尊卑之等也○周禮司尊彝疏謂此據侯伯禮尸飲五獻卿爲醕尸三獻之後此篇鄭氏注云尸飲五謂醕尸五獻也疏謂此據九獻之禮主人醕尸爲尸飲五蓋注疏之說皆謂二裸尸不飲故也人君獻尸用玉爵醕尸用瑤爵此獻卿用玉爵因獻尸之爵此必在醕尸之前而二裸尸亦卒爵益可見矣特牲禮賓長獻尸爵止而主人主婦致爵尸作止爵飲畢

而主人獻賓此於尸飲五而獻賓則致爵當在其前其於主人饋獻之後與

夫祭有昭穆昭穆者所以別父子遠近長幼親疏之序而無亂也是故有事於大廟則羣昭羣穆咸在而不失其倫此之謂親疏之殺也

羣昭羣穆謂子孫之昭穆也宗廟之禮始祖爲大廟自此以下每一世爲昭每一世爲穆而子孫亦以爲稱其在大廟之中昭爲一列穆爲一列雖其世數之久人衆之多而其父子遠近長幼親疏皆可得而序也孔氏曰祭大廟則羣昭羣穆咸在若餘廟唯所出之子孫來耳古者明君爵有德而祿有功必賜爵祿於大廟示不敢專也故祭之日一獻君降立于阼階之南南鄉所命北面史由君右執策命之再拜稽首受書以歸而舍奠于其廟此

爵賞之施也

釋文編許亮反舍依注音釋

鄭氏曰一獻一酌尸也舍當為釋孔氏曰酌尸之前皆為祭事承奉鬼神未暇策命至尸食已畢祭事方了可以行爵賞也若天子命羣臣則不因常祭之日特假於廟故大宗伯云王命諸侯則儻註云王將出命假祖廟立依前南鄉是也舍奠于其廟者卿大夫既受策書歸而釋奠於家廟告以受君之命也愚謂史內史也由君右者詔辭自右也策所以書命辭者也王於卿大夫蓋亦因祭時命之其命諸侯及有大功若召穆公者則不待祭時與

君卷冕立于阼夫人副禕立于東房夫人薦豆執校執醴授之執鐙尸酢夫人執柄夫人受尸執足夫婦相授受不相襲處酢必易爵明夫婦之別也

釋文卷古本反校尸教反又尸交反盥音登又

丁鄧反○夫人受尸舊本誤作授尸今據孔疏及石經正之

鄭氏曰校豆中央直者也鐙豆下跗也孔氏曰執醴授之執鐙者夫人獻尸此人執醴以授夫人至夫人薦豆又執豆以授夫人獻與薦皆此人所掌執醴之人授夫人以豆執鐙夫人受之乃執校也爵爲雀形以尾爲柄尸酢夫人執爵尾夫人受尸執爵足也夫婦相授受不相襲處謂夫婦交相致爵之時其執之不相因故處也酢必易爵謂主人致爵於主婦更爵自酢鄭註特牲云男子不取婦人爵也愚謂特牲少牢禮主人主婦獻尸皆親洗酌主婦薦豆自東房亦無贊授之者此云執醴授之執鐙是夫人獻尸不親酌其薦豆又有贊授之者皆與大夫士禮異矣尸酢夫人執柄夫人受尸執足則夫人獻尸亦執足尸受夫人亦執柄矣夫婦猶言男女

君與夫人所立之異所執器之異處主人自酢之易爵皆以明男女之別也

凡爲俎者以骨爲主骨有貴賤殷人貴髀周人貴肩凡前貴於後俎者所以明祭之必有惠也是故貴者取貴骨賤者取賤骨貴者不重賤者不虛示均也惠均則政行政行則事成事成則功立功之所以立者不可不知也俎者所以明惠之必均也善爲政者如此故曰見政事之均焉釋文

髀必氏反又必履反重直龍反

鄭氏曰殷人貴髀爲其厚也周人貴肩爲其顯也凡前貴於後謂脊脊臂臑之屬孔氏曰殷質貴髀之厚賤肩之薄周文貴肩之顯賤髀之隱凡前貴於後據周言之愚謂爲俎謂主人以下及助祭者之俎也凡牲之體骨兩肱各三肩臂臑也兩股各三髀髀髀也脊三正脊脰

脊橫脊也兩肋各三代脅長脅短脅也其右胖以爲尸  
俎其左胖以爲主人主婦及助祭者之俎殷人貴後而  
髀則後體之上者周人貴前而肩則前體之上者貴者  
取貴骨賤者取賤骨言自主人以下之俎以貴賤次第  
用之也然骨雖有貴賤而未嘗不各有所取則惠無不  
均矣人君欲恩惠周徧必由於政事之均平故於爲俎  
而可以見政事之均焉

凡賜爵昭爲一穆爲一昭與昭齒穆與穆齒凡羣有司皆  
以齒此之謂長幼有序

賜爵謂獻之也羣有司謂異姓之士也卿大夫及士之  
有事於廟者皆別獻之前云玉爵獻卿瑤爵獻大夫散  
爵獻士是也其士之無事於廟者同姓則使昭爲一列  
穆爲一列而以年齒爲序異姓則雖不序昭穆而亦以



齒爲序而皆次第獻之也此獻昭穆及羣有司卽上云尸飲九獻羣有司皆以齒是也但上則通卿大夫士而等其位所以明貴賤此則就同於爲士之中而序其齒所以別長幼義各有所主也

夫祭有舁燁胞翟闔者惠下之道也唯有德之君爲能行此明足以見之仁足以與之舁之爲言與也能以其餘舁其下者也燁者甲吏之賤者也胞者肉吏之賤者也翟者樂吏之賤者也闔者守門之賤者也古者不使刑人守門此四守者吏之至賤者也尸又至尊以至尊既祭之末而不忘至賤而以其餘舁之是故明君在上則竟內之民無凍餒者矣此之謂上下之際

釋文燁依注作鞞况鞞反又音運胞步交反

舁謂頒胙及之也鄭氏曰明足以見之見此舁者也仁足以與之與此舁者也燁周禮作鞞謂鞞磔皮革之官

也翟謂教羽舞者也古者不使刑人守門謂夏殷時孔氏曰夏殷不使刑人守門故雖賤人得受恩賜際接也言至尊與賤者其道相接也方氏慤曰祭之有俎固已見惠均矣然未足以盡惠下之道以至尊之尸而昇至賤之吏然後見惠下也此政事之均與上下之際所以異焉○此以上明十倫又以申道之以禮之義也

凡祭有四時春祭曰祈夏祭曰禘秋祭曰嘗冬祭曰烝祈禘陽義也嘗烝陰義也禘者陽之盛也嘗者陰之盛也故曰莫重於禘嘗古者於禘也發爵賜服順陽義也於嘗也出田邑發秋政順陰義也故記曰嘗之日發公室示賞也草艾則墨未發秋政則民弗敢草也

釋文祈羊灼反字又作禴艾音刈

鄭氏曰莫重於禘嘗者夏時尊卑著而秋萬物成爵命屬陽國邑屬陰愚謂祈禘嘗烝夏殷四時之祭名也天

子別有大禘之祭故周改春夏祭名以避之春日祠夏  
曰禴而諸侯之祭其名不改故春秋魯有禘祭而晉人  
亦曰寡君之未禘祀是也莫重於禘嘗者魯之大禘因  
夏禘行之諸侯之大禴因秋嘗行之故記者因以禘嘗  
爲重也秋政謂刑殺之政也發公室謂發公室之貨財  
以賞賜也草艾謂季秋草木黃落伐薪爲炭之時也墨  
五刑之輕者每歲行刑自輕者始象天道之殺物有漸  
也行墨刑則發秋政矣故其時可以艾草未發秋政則  
民弗敢艾草也孔氏曰左傳云賞以春夏刑以秋冬其  
實四時皆有賞故車服屬夏田邑屬秋

故曰禘嘗之義大矣治國之本也不可不知也明其義者  
君也能其事者臣也不明其義君人不全不能其事爲臣  
不全

明其義者知其所以然能其事者循其所當然也

夫義者所以濟志也諸德之發也是故其德盛者其志厚其志厚者其義章其義章者其祭也敬祭敬則竟內之子孫莫敢不敬矣是故君子之祭也必身親蒞之有故則使人可也雖使人也君不失其義者君明其義故也其德薄者其志輕疑於其義而求祭使之必敬也弗可得已祭而不敬何以爲民父母矣

濟成也志卽與志進退之志義明然後志重故義者所以濟志也義非有德者不能明故明於其義乃諸德之所發見也祭而不敬則無以爲立教之本故不可以爲民父母○此上三節申前參之以時之義而又歸本於志也

夫鼎有銘銘者自名也自名以稱揚其先祖之美而明著

之後世者也為先祖者莫不有美焉莫不有惡焉銘之義稱美而不稱惡此孝子孝孫之心也唯賢者能之

鄭氏曰銘謂書之刻之以識事者也自名謂稱揚其先祖之德著已名於下

銘者論譏其先祖之有德善功烈勲勞慶賞聲名列於天下而酌之祭器自成其名焉以祀其先祖者也顯揚先祖所以崇孝也身比焉順也明示後世教也

釋文譏音撰此志反

鄭氏曰烈業也王功曰勲事功曰勞酌之祭器言斟酌其美傳著於鐘鼎也身比焉謂自著名於下也自著名以稱揚先祖之德孝順之行也教所以教後世也

夫銘者壹稱而上下皆得焉耳矣是故君子之觀於銘也既美其所稱又美其所為為之者明足以見之仁足以與之知足以利之可謂賢矣賢而勿伐可謂恭矣

釋文知音智見賢遍

反○今按  
見如字

鄭氏曰見之見其先祖之美也與之與其先祖之銘也  
利之利己名得比於先祖愚謂上謂先祖下謂己身美  
其所稱美其先祖有可稱之美也美其所為美其子孫  
能稱其先祖之美也

故衛孔悝之鼎銘曰六月丁亥公假于大廟公曰叔舅乃

祖莊叔左右成公成公乃命莊叔隨難于漢陽即宮于宗

周奔走無射

釋文悝孔回反假加百反左右音佐又  
又如字難乃旦反奔本又作辨射音亦

鄭氏曰孔悝衛大夫也公衛莊公蒯聩也德孔悝之立

己依禮褒之假至也至於大廟謂以夏之孟夏禘祭公

曰叔舅者公為策書尊呼孔悝而命之也乃猶女也莊

叔悝七世祖孔達也隨難者成公為晉文公所伐出奔

楚命莊叔從焉漢楚之川也即宮于宗周後反得國坐

殺弟叔武晉人執而歸之於京師寘之深室也射厭也  
言莊叔奔走勞苦而不厭倦也孔氏曰按左傳哀公十  
五年冬蒯賁得國十六年六月飲孔慳酒而逐之此得  
六月命之者蓋命後卽逐之孔慳是異姓大夫故稱叔  
舅

啟右獻公獻公乃命成叔纂乃祖服

鄭氏曰獻公衛侯衍成公會孫也亦失國得反右助也  
言莊叔之功流於後世啟右獻公使得反國也成叔莊  
叔之孫成子烝鈕也纂繼也服事也獻公反國命成子  
繼莊叔之事欲其忠如孔達也

乃考文叔與舊者欲作率慶士躬恤衛國其勤公家夙夜  
不解民咸曰休哉釋文者市志反解古責反

鄭氏曰文叔者成叔之曾孫文子圉卽慳父也應氏鑄

曰者欲者心志之所存言其先世之忠皆以愛君憂國  
爲者欲文叔嚮慕而興起之也作率奮起而倡率之也  
慶士卿士也古卿慶字通故慶雲亦言卿雲

公曰叔舅子女銘若纂乃考服慳拜稽首曰對揚以辟之  
勸大命施于烝彝鼎此衛孔慳之鼎銘也

若乃皆女也言予命女以此辭銘著於器女當繼乃考  
文叔之事也蓋成公獻公莊公皆失國得反故莊公稱  
慳先世之功以褒美之而因以勉其後也對答揚舉也  
以用也辟君也勸大命殷勤尊大之命也烝冬祭也彝  
法也彝鼎法度之鼎也言君有此殷勤尊大之命已當  
對答稱揚用以施於烝祭法度之鼎也獨言烝者大夫  
干祿在冬與天子大祿以冬司勳凡有功者銘書于王  
之大常祭于大烝是也諸侯大祿以秋避天子也大夫



干祿以冬又避其君也

古之君子論譏其先祖之美而明著之後世者也。以比其身以重其國家。如此子孫之守宗廟社稷者。其先祖無美而稱之。是誣也。有善而弗知。不明也。知而弗傳。不仁也。此三者君子之所恥也。

自夫鼎有銘。至此明鼎銘之義。因上文言祭祀致敬。而稱揚先祖。亦敬親之一端也。故廣而言之。然孔愷之事本無足道。記者亦節取之耳。

昔者周公旦有勲勞於天下。周公既沒。成王康王追念周公之所以勲勞者。而欲尊魯。故賜之以重祭。外祭則郊社是也。內祭則大嘗禘是也。夫大嘗禘升歌。清廟下而管象。朱干玉戚以舞。大武八佾以舞。大夏。此天子之樂也。康周公故以賜魯也。子孫纂之。至于今不廢。所以明周公之德。

而又以重其國也

鄭氏曰言此者王室所銘若周公之功干戚武舞之所  
執也侑列也大夏禹樂文舞也執羽籥文武之舞皆八  
列互言之耳康猶褒大也愚謂大嘗大禘也諸侯皆得  
社與大禘惟不得郊與大禘此因郊而并言社因禘而  
并言嘗耳然魯之郊禘本惠公以後之僭禮而託言出  
於王賜耳記之所言則因魯之所自託者而遂傳以爲  
實也餘說已見文王世子及明堂位

禮記卷四十七終

貢生瑞安後學繆國賓校